

## Nimogim Petro Leta Petromna Iriki Nimogim Ju Riga wa pilwa Leta Isipkita Yitkak

Onggityam leta irika riga re Petrote. Ḧ ton itemb leta yirikonj re A.D. siksiti siks (66) kemag nat. Ḧ ton yirikonj re gar ke utkunda riga wa pilwa na yepiya re wimena wuwenonj bargubo gatabind Asiya wingirind. Ḧ opimemb gar ke utkunda riga re ma sobijog na bebig dide b'isadrena mile wiip awarkenento. Aji ton kwa nonysipsip aukenento re b'anyginena ouyaena riga waina ouyaena kena.

Petro kwa gar ke utkunda riga nonony amneniny da, "Win b'ogla towinkindam gar ke utkunda milemna wumir dide omnika ke, nokim da idenat win b'obogil b'agoka tuwenyit opimemb b'anyginena ouyaena riga wa pilke." Ḧ kwa nonony amniny da God opima b'anyginena ouyaena riga negir tamniny dem, ra Yesu titenj Tina tirir omni yit ririrkind. Petro ket yimak yit amneniny opimemb gar ke utkunda riga yilo wimenam yina milend dide Godind ewangaya milend.

### *Simesime Yitkak*

<sup>1</sup> Simesime! Kon re Yesu Kerisomna wiiko riga dide itmikitijog riga Simeon Petroten. Ḧ kon itemb leta yiriken re wa pilwa e yepim re gar ke utkunda yokatenya yipa ririrkip it re sin re dide. Mop nokip win onggityam gar ke utkunda yokatenya re negir

kesa dimdimjog milem pilkae rina re mera God dide yirkokar okawa riga Yesu Keriso yoramitonj.

<sup>2</sup> I wiñ kemb God dide mera Yonggyam Yesu Keriso towa gatab iminjog wumir yokatenya. Si ingkaimemb Godimna wurar dide ngimbla wa pilind ukojog b'usmurena tekenya.

### *Godimna Ara B'emoka dide Obagenda*

<sup>3</sup> I Yesum pilind ita God ma yinayina danda, dide men wumir im da Ton men ara nemokinonj Tinajog b'ogil inyomarena dide mera b'ogil okawa mana. Si ingkaimemb Yesu mera nogoneneniny komkesa ingaena gasa yirkokar wimenam dide Godind ewangayam.

<sup>4</sup> I onggit nya kaimemb ton kwa mera nogoneneniny otomanti isnawa kima ukojog tirir omni yit. Nokim da idenat onggit tirir omni yit ke wiñ onggityam riga taindam yepiya re b'ikento negir itkika mile ke rina re wekenenonj onggit gowukoi negir mile singind, i ket Godimna kukip ke omnika mile yingg takatenenanj.

<sup>5</sup> I God ija imemb ji amnikeniny wanim. Si onggit paemb wiñ b'ogla waina kupka danda tenggaenindam waina gar ke utkunda ke b'urowatam de otomantijog mile wa, i otomantijog mile ke b'urowatam de b'ogil wumir wa,

<sup>6</sup> i b'ogil wumir ke b'urowatam de walenggyam b'agoka mile wa, i walenggyam b'agoka mile ke b'urowatam de bebig wingirind mimkam wimena mile wa, i bebig wingirind musik wimena mile ke b'urowatam de Godind ewangaya mile wa,

<sup>7</sup> i Godind ewangaya mile ke b'urowatam de gar ke utkunda nany dide yingganwar wingirind

iminjog nanyinggaan pila singi b'iyena mile wa, i dide gar ke utkunda nany dide yingganwar wingirind iminjog nanyinggaan pila singi b'iyena mile ke b'urowatam de gar ke singi b'iyena mile wa.

<sup>8</sup> Mop nokip ra onggityam mile tekeny wa pilind i b'utusmurenanj, si tonsimemb wen danda kima wiko omnikam tamnenenanj dide kip kimam tamnikenenanj. Ingkaimemb win b'obogil wumir takatenindam mera Yonggyam Yesu Kerisom pilind.

<sup>9</sup> Aji yet ra maka ibim onggit mile kima, ton re wingawinga nya ke yirdidi riga e. Si ton ma ririr e b'obogil yir ongongim God ma pumb tungg gatab iminjog yitkak aji gowukoi gasa nena yir angeneniny, odede yete re ma ririr e yir ongongim gasa rinte re yibim paja tungg wa. I dide ton kupkakupka nony b'edateneny da Keriso kea yiklekainonj tina kesam omni ki negir mile.

<sup>10</sup> Onggit paemb gar ke utkunda nany dide yingganwar! Si win b'ogla isanikesa waina kupka danda tengaanenindam seo kima imjatam da Godit wen ara emokinonj dide abagikinonj. Mop nokip ra win odede gasa tamnikenenindam, win makwa opima sap totendenenindam,

<sup>11</sup> i dide b'usaya kwa ra God ma sobijog nony sam kima e nya tepangendau dem b'igaram de mera Yonggyam dide yirkokar okawa riga Yesu Kerisomna dadal ngirpu kesa pumb tungg wa.

### *God ma Iminjog Yitkakim pilind Onyitam*

<sup>12</sup> Si win opima wumir akatenindam God ma iminjog yitkak rinsim re win owama eyenindam, dide imninena kesa onyitenindam onggityam

yitkak wa pilind. Aji kwa kon opima ita winind wen nonony tamnikeneninyin onggityam yitkak gatab.

**13** I kon nony aen da ra kon onggit koina ji ke yilond nitibnyin onggit gowukoyind, itemb re kor maemb ji wiko waina nony menamena yir opngikam. Nokim da idenat win ita winind nonyik tamdenenindam onggityam yitkak gatab.

**14** Mop nokip kon kemb b'angwasin da koina onggityam plaimet pila ji re ma pin e iraren, odede wip it re Yonggyam Yesu Keriso wumir nomnonj.

**15** Aji kon ita danda kima b'itngainyin da win onggityam gasa nonyind owama teyenenindam ita winind ra kon gowukoi iraren dem.

**16** Isin kemb wen wumir amniktondam da, mera Yonggyam Yesu Keriso ita ik dem danda kima. Si sin ma inte yimta yundoku rigaina multekip ke otobarki kakyit. Aji sin kea sowainajog yirkip ke Tin yir yongonda re Ton ukojog danda kima pita awonj.

**17** Si Ton re kea akatonj isnawa dide b'ogil inyomarena Abu Godim pilke, re ara ikonj Ti pilwa ukojog danda kima b'ogil inyomarenand odede da, "Itemb re Koina b'iga e yena re Kon singi yiyyenyin, i ya pilnate re Kon sam aukenenyin."

**18** Ire sin yipand Ton kima wekenond onggityina dor kumbind rikind re God pita awonj, sinpiya utkundonda onggityam ara rina re ikonj wub kumb ke.

**19** I men God ma iminjog omnijog bage yitkak kima im wekenyin rina re ririrkip aukonj Ti pilind. Itemb God ma bage yitkak re ngaya e waina garind, odede ringma re rigap sibibind enyorati ngaya

kima wuweneny gasa ongwatam ngirpu ra guj ngaya t̄lis ispara momtand. Si itemb re b'ogil emb ji wanim nonyind owamam dide yimta undokam itemb yitkak, ngirpu mera Yonggyam Yesu Keriso ik dem.

<sup>20</sup> I itemb re naskajog ukojog e, win wumir ainam da komkesa God ma bage peba re ma bageyam towainajog ongwati ke iriki im.

<sup>21</sup> Mop nokip makwa ke ngai yipa God ma bage yitkak aukonj rigaina singi ke, aji God ten riga engaeneninonj ya pilnat re Yinayina Wingawinga b'imuri yibnenenonj. Si ton Godim pilkena yitkak akatenento dide ingkenaemb ket apurenento.

## 2

### *Yir kima Wimenam Negir B'anyginena Ouyaena Riga gatab*

<sup>1</sup> Aji kea b'anyginena bageyam pita aukenento Israel riga wa wingirind. I odede wip nya ke opima kwa b'anyginena ouyaena riga pita taukanj dem wa wingirind. Si ton opima wa wingir wa wigawiga teyenanj dem negir b'anyginena ouyaena rinsim ra wen wip tamnenanj dem negir omnikam. I dide ton kwa oena iyenyi Ukoijog Yonggyam, Yesund yet re Tina kus ke ten akasinonj towanim b'itraram negir milem pilke. Si onggit paemb ton kwa towalenggyam wip b'itiyenanj dem negir okatam rinte ra kid kesa kima wanakana ik dem.

<sup>2</sup> I ma yipa kima rigapim ten yimta tundokenenanj dem dide b'ogil mile engka teyenanj dem negir omnika mile wa. Si ingkaimemb gar ke

utkunda kesa rigap tesadrenanj dem Godimna iminjog nya rina re Keriso auyaeninonj.

<sup>3</sup> I kwa b'anyginena bageyamip opima butum mile teyenanj dem. I onggit mile kaimemb ton yitkak tejongkenenanj dem wa pilke wulkip okatam. Towaina negir ma b'isagika re kea b'ila ke ongonjeni e ebnau dide ma yir ungauka kima e. Si God yet ra ten negir tamnikiny dem, Ton ma yutunga e yikeny.

<sup>4</sup> Mop nokip re anerup negir mile amnikto, God makwa yena komb yomnonj, aji ten etmikurinonj de negir ma isma okatenapu pipmet wa, i aramkinonj de sibibsib kip bora wa ten owamam, ngirpu ra Yonggyamimna b'isagika bibir ik dem.

<sup>5</sup> I dide b'ila God makwa gowukoi wewe yomnonj. Aji re Ton ngiwir yitmikitonj onggit gowukoi negir mile riga wa pilwa yepiya re maka Tin yewangaeneno, Ton ina nena na ewaensinonj Nowa yet re negir kesa dimdimjog mile pitapita yommenonj dide tinajog seben (7) riga.

<sup>6</sup> I re God tirir yit yindenonj Sodom ake Gomora taun negir ma b'isagikam, Ton kea ket wul dimil ke eomnenonj ngirpu wumbolim engendonj. Si ingkenaemb Ton wingata yoramitonj ouyawam Tinim ewangaya kesa riga wa pilwa da ita Godimna negir ma b'isagika tawik dem.

<sup>7</sup> I re God itemb Sodom taun yeomnenonj, Ton kea negir kesa dimdimjog riga, Lotind yopendonj onggit taun eomnena wingir ke. I onggit winind Lot re ma sobijog bebig na akateninonj, mop nokip onggit taun rigap gog kesa jabajaba negir b'iyena mile dide b'ogil mile engka eyento negir omnika mile wa.

**8** Mop nokip re itemb negir kesa dimdimjog riga, Lot, yibnenenonj towa ganggand, ton bibir weanjweanj yir ongong eyeneninonj dide utkundenenonj towaina gog kesa negir mile. Si onggit penaemb tina negir kesa dimdimjog gar ma sobijog na negirjog b'idgotnena yokatenenonj.

**9** Si rada God ke odede nya ke mile amnikeninonj, Yonggyam God, Ton wumir e rija e Tinim ewangaya riga opendam towaina b'idgotnena wingir ke. I Ton kwa wumir e rija e Tinim ewangaya kesa negir riga oramitam de negir ma b'isagika wa dide ten owamam ngirpu ra b'isagika bibir okas dem.

**10** I riga opima gim ke negir mile yimta undokenenanj, i negirjog wimena wuweny gowukoi negir mile singind, i dide nonyik erinenenonj ten yena re God danda agoninonj towanim wip iyenam. Si God ukojog wumir e rija e ten oramitam negir wa dide owamam ngirpu ra b'isagika bibir okas dem. Si opimemb b'anyginena ouyaena riga re ingar kesa ukoi b'asourena kima mop kikib riga im.

Dide ton rawir kwa moga aenenanj isadrenam b'ogil inyomarena kima God ma omniki wub kumb riga wa pilwa.

**11** I opimemb b'anyginena ouyaena riga re ma danda kima im, aji aneru re ukojog danda kima im. Aji opimemb danda kima anerup makwa opima ton negir aneru gatab negir ma b'isagika yit eyenanj isadrena kima Yonggyamim wipind.

**12** Aji opimemb b'anyginena ouyaena riga re nony menamena kesa tibam b'angga pila im. I men wumir im da tibam b'angga ukukto re nony

menamena kesa na, si rigap ririr im orakam dide idrikam. Si opimemb riga todaka opima tibam b'angga pila nony menamena kesa esadrenenanj gasa rinsim re ton ma wumir im. I kwa ton opima negir taukenenanj odede yipa wiip opi re tibam b'angga negir aukenenanj.

<sup>13</sup> I ton negir kima kaokao mile im amnikenenanj, si ingkaimemb ton negir kima b'idgotnena mira akatenenanj. I ton sam yomnikenenyi re gowukoi negir sam mile wa pilnasim rinsim re ton isanikesa amnikenenanj bibirtikind. I ra ton win kima yipand diyamdiyam tauranj, ton re kil kima im dide ingar kima im aukenenanj, nokip ton towaina b'anyginena nya kaim isanikesa samim aukenenanj.

<sup>14</sup> I ton amima kupka yir b'iskenenanj kongga wa pilwa gigir dide yigyig b'iyena mile omnika singind. I dide onggityam towaina negir mile omnika singit ma ita ten ena agnatenenanj. I ton b'anyginena yit ke riga ugungatenenanj ton kima yipand awowim yepim re maka danda kima b'obogil God ma yit yokatenyi. I ton butum mile amnikenenanj, i ingkaimemb ton towaina gar danda kima amnikenenanj onggit mile omnikam. Si ton re kea Godimna negir sake okateni riga im.

<sup>15</sup> I ton kea dimdim nya yiraro dide okondurto, i ket yimta yundokenenyi re Beorim b'iga Balaamna negir ouyaena mile e. I Balaam re mira wulkip na singi eyeneninonj tina negir kima kaokao mile omnika ke.

<sup>16</sup> Aji re ton tilenggyam onggityam tinajog negir mile yomnikonj, yit kesa b'angga dongkit Godimna samany yit apureninonj ti pilwa rigaina

nonykok ke, i yiswangonj onggit bageyamimna korirkorir mile omnikam.

**17** I opimemb b'anyginena ouyaena riga re ija im opi re ugki nyi kip re dide, i dide ija im opi re tema ringmim re ribit utureneniny. Si towanim re gipargipar sibibjog pipmet e ongapi ebnau.

**18** Mop nokip ton kip kesa b'asourena yit im apurenenanj, dide jiwind gim ke negir singi im eyenanj. Si ingkaimemb ton b'anyginena nya ke riga ugungatenenanj negir mile omnikam yepiya re sisil itringkito towa pilke yepim re wimena wuweneny negir kaokao milend.

**19** Si onggit b'anyginena ouyaena rigap opima onggityam sisil itringki riga wa odede tirir yit amnenanj da towa ita ebnau b'itraram mile. Aji ton towalenggyam re onggityam wiko riga im yepim re negir itkiki omnika milend wekeny. Mop nokip yet ra gou wa tainy yipa rigamna danda ke, ton re kemb tinim wiko riga e ainy.

**20** I ra opimemb b'anyginena ouyaena riga, ton mera Yonggyam dide yirkokar okawa riga Yesu Kerisond wumir okatenyi, si ingkaimemb ton onggit gowukoi negir omnika mile ke b'itkenanj. Aji rada ton kwa b'usaya onggit negir mile wa b'itgaranj, i onggit milet ten tanomkeneniny, i dide ten gou wa tukoukeneniny, si wimena rinte re yimta ke awik towanim re ukojog bebig e, aji wimena rina re aukonj naska re ma ukoi bebig na.

**21** Mop nokip rako ton maka wumir auto onggityam negir kesa dimdimjog milemna ouyaena nya, si keako towanim wewa na tainy Godimna b'isagika winind. Aji ton kea onggityam nya wumir auto, i yimta ke kak engkito yina

b'ingawa yitim pilke rina re God towa akainonj, si itemb re towanim bebigjog e.

<sup>22</sup> Si onggityam tendam yitkak re iminjog e ririrkip ainy towanim. Si ija emb ji yinden da, "Yongg ra ama titenj onggit minjim pilwa rikind re ton minj b'akawik." I kwa yinden da, "B'om rinte re gony aureni yibim, ama titenj tina pam b'inapu gop wa."

### 3

#### *Yonggyam Yesu ma Itenda gatab Yit*

<sup>1</sup> Kor rigawar yena re kon singi eyeninyin! Onggityam peba re nimogim iriki e wa pilwa. Ikon osiemb nimog pebamna yit kaim wen utnikam amneninyin iminjog nonyind owamam waina garind.

<sup>2</sup> Si kon singi en da, win nony wuwene bage yitkak wa rina re yina bageyamip apurento, dide kwa Yonggyam dide yirkokar okawa rigamma b'ingawa yitkak wa rina re waina itmikitijog rigap wumir amnento.

<sup>3</sup> I win b'ogla naska wumir taindam da, yitkar riga opima tuweny dem kikitum winind, i ton yimta tundokenenanj ra towainajog gowukoi gim ke negir mile singi im, dide ngong engena kima yitkar mile tamnikenenanj dem.

<sup>4</sup> Si ton odede ngong engena kima yitkar yit tapurenanj dem da, "Rokate ji tirir yit yibim da ita Ton ik dem? Mera b'uwar re kea uj aukenento, aji onggit kak ke makwa yipa gasa b'engendonj, komkesa gasa re ija ima wekeny rija na re God atobarkinonj naskand."

**5** Mop nokip ton onggit yit kaim b'atonkenenanj nony b'edatam onggit gatab da b'ila God ma yitit wub ake gou atobarkonj, si wub re indama yibneneny, dide gowukoi pita yomnonj re nyi kena, i yonyitonj nyi ganggand.

**6** I yipa winind onggit nyi kena ngiwir aukonj, i dide gowukoi negir awonj.

**7** I onggit yipaina God ma yitte angapeneny wub ake gowukoi. Si yu wub ake gowukoi ebnya re wul ke imbrika mi, ngirpu onggit bibirind ride nat ra God riga isagika teyeniny dem dide Tinim ewangaya kesa riga negir tamniny dem.

**8** Aji kor rigawar yena re kon singi eyeninyin! Win goro nony b'etedata onggityam yipa gasa, it re da Yonggyamim wipind yipa bibir re ija e it re wan tausin (1,000) kemag re dide, i dide wan tausin (1,000) kemag re ija e it re yipa bibir re dide.

**9** I ninda rigap nony menamena amnikenenanj odede da, "Yonggyam ma opima wanakana Tina tirir yit iminjogim tamniny." Aji ma ija e, Ton re mimkam kae wimena yikeny wanim b'ogilim, mop nokip Ton ma singi e yipa riga negir okatam, aji Ton singi e da komkesa riga wa gangga okawam towanim negir mile ke engendam Ti pilwa.

**10** Aji Yonggyamimna bibir ik ra dem odede e it re yurowamam riga re dide. Si onggit bibirind, wub opima ukoi dudlam kima tewaikenanj dem, i komkesa wub kumbind gasa ukoi danda kima wulit tembrikiny dem dide taklekiny dem. I kwa gowukoi dide komkesa gasa onggit wingirind opima tembrikiny dem dide taklekiny dem.

**11** Si ra God komkesa gasa odede nya ke taklekiny dem, si b'ogla win ride dede wip riga im

tekenyit? Si *wiñ* b'ogla *wimena* tuwenyit yina milend, i b'ogla Godind b'obogil ewangaenena.

**12** I *wiñ* b'ogla yir ungaukya dide singi iyenga nony sam kima da Godimna bibir wanakana e ik. I ra itemb bibir ik dem, ukoi danda kima wulit wub opima tembrikiny dide taklekiny dem, dide onggit wulimna pembit komkesa wub kumbind gasa kwa opima taklekiny dem.

**13** Aji men yir ungaukindam re sisil wub im dide sisil gowukoi e, nokip God kemb onggityam gatab tirir yit yindonj. I dem de onggit sisil wub dide sisil gowukoi wa negir kesa dimdimjog mile nena e ibneneny.

**14** Kor rigawar yena re kon singi eyeninyin! Si onggit paemb ra *wiñ* onggityam gasa yir tungaukindam aukam, *wiñ* b'ogla b'obogil b'itngaindam komkesa mile kilkip kesa dide b'injawa kesa omnikam. Si ingkaimemb God wen yir tanginy dem ngimblard.

**15** I *wiñ* b'ogla ongwasya da mera Yonggyamimna mimkam ke *wimena* re wanim b'ogil gangga e yirkokar okawam. Si meraina gar ke utkunda riga Pol yena re men singi iyenyu, ton kea Godim pilke multekip yokatonj, i ingkaimemb toda kwa odede yipa wiñ yitkak wa erikainonj.

**16** I ton, Pol kwa odede God ma okai multekip kena yitkak erikinonj tina komkesa peband, dide ton onggit kikitum *wiñ* gatab opima apureniny tina peba wingirind. Si tina peba wingirind, ninda yitkak wekeny re nony auka kesa im okatam. I ninda God ma yit b'auyaeni kesa rigap dide ninda God ma yit okateni kesa rigap onggityam nony auka kesa seo kima yitkak

nenegir kana im askamkenenanj odede nya kaim opi re ringmim re ton ninda Polimna b'enga yina peba esipkenenanj. Si ingkaimemb ton towaleng-gyam towanim negir amnikenenanj.

<sup>17</sup> Kor rigawar yena re kon singi eyeninyin! Si win kea naska nata wumir aukitondam onggityam gatab. Si onggit paemb win b'ogla waleng-gyam b'obogil yir b'itenindam onggityam gog kesa b'anyginena ouyaena riga gatab. Nokim da idenat ton maka wen wip teyenanj towaina negir ouyaena wa, i dide ingkaimemb win maka sap totekindam waina imninenesa kesa gar ke utkundam pilke.

<sup>18</sup> Aji win b'ogla takasindam mera Yonggyam dide yirkokar okawa riga Yesu Kerisomna wurar dide Ti gatab wumir. Si ingkaimemb win danda kima towinkenenindam. Si b'ogil inyomarena Ton kima yunim dide kwa dadal ngirpu kesa, imnjog!

**Wipi Yit God ma Yina Sisil Yina Peba  
The New Testament in the Wipi Language of Papua  
New Guinea  
Nupela Testamen long tokples Wipi long Niugini**

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

---

PDF generated using Haiola and XeLaTeX on 28 Dec 2024 from source files  
dated 31 Aug 2023

a5a5213a-fb12-52b5-9c99-efb8044c6646